

Árið 1995, 8. september, var Kjaradómur settur að Kalkofnsvegi 1, Reykjavík og haldinn af Þorsteini Júlíussyni, Hólmfríði Árnadóttur, Jóni Sveinssyni, Magnúsi Óskarssyni og Othari Erni Petersen.

Fyrir var tekið:

**Að ákvarða laun þeirra sem 2. gr. laga nr. 120/1992
og 3. mgr. 2. gr. laga nr. 83/1994 taka til.**

Hinn 11. janúar 1993 tóku gildi lög nr. 120/1992 um Kjaradóm og kjaranefnd. Með lögum þessum varð viðamikil breyting á starfsemi Kjaradóms frá því sem áður hafði verið, m.a. var verulega fækkað þeim aðilum sem Kjaradómur ákveður laun. Hinn 1. júlí s.l. tóku gildi lög nr. 88/1995 um þingfararkaup alþingismanna og þingfararkostnað sem leystu af hólmi lög nr. 76/1980 um þingfararkaup. Með lögnum var einnig breytt ákvæðum laga um Kjaradóm á þann veg að Kjaradómur ákveður nú aðeins þingfararkaup en ekki kostnað þingmanna vegna þingsetu. Samkvæmt 3. mgr. 2. gr. laga nr. 83/1994 ber Kjaradómi einnig að ákvarða laun umboðsmanns barna.

Meginreglur þær sem Kjaradómur á að hafa í huga við ákvörðun launa er að finna í tveimur málsliðum 5. gr. laga um Kjaradóm. Í fyrri málslið er kveðið svo á að dómurinn skuli við úrlausn mála gæta innbyrðis samræmis í starfskjörum þeim sem hann ákveður og þess að þau séu á hverjum tíma í samræmi við laun í þjóðfélaginu hjá þeim sem sambærilegir geta talist með tilliti til starfa og ábyrgðar. Í síðari málslið sömu greinar segir síðan: "Ennfremur skal Kjaradómur taka tillit til þróunar kjaramála á vinnumarkaði." Það markmið sem felst í fyrri málslið 5. gr. hlýtur að takmarkast af síðari málslið greinarinnar.

Æðstu stjórnendum ríkisins ber að launa sæmilega. Vandfundin eru hins vegar störf sem sambærileg verða talin störfum þeirra. Til dæmis eru ýmis stjórnunarstörf í þjóðfélaginu sem tæpast verða talin fela í sér meiri ábyrgð talsvert betur launuð en störf ráðherra.

Frá 1989 þar til lögum um Kjaradóm var breytt í árslok 1992 tóku úrskurðir hans eingöngu mið af grunnhækkunum kauptaxta. Eftir að núgildandi lög um Kjaradóm

tóku gildi hefur dómurinn engan úrskurð felld um almennar kauphækkningar. Frá 1989 hefur þannig verið horft fram hjá ýmsum launabreytingum svo sem breytingum á röðun í sérsamningum, launaskriði og fleiru og frá árslokum 1992 einnig öllum taxtahækkunum.

Samkvæmt framansögðu og með vísan til síðari málsliðar 5. gr. laga um Kjaradóm telur dómurinn rétt að hafa hliðsjón af þeirri launaþróun sem orðið hefur á vinnumarkaði frá 1989. Þrátt fyrir ákvæði fyrri málsliðar 5. gr. telur dómurinn hins vegar ekki fært, eins og á stendur, að miða laun æðstu stjórnenda þjóðarinnar við laun þeirra sem helst gætu talist sambærilegir með tilliti til starfa og ábyrgðar. Dómurinn telur þó rétt og í samræmi við þær lagareglur sem dæma ber eftir að gera nokkra leiðréttingu á launum þeirra sem undir hann heyra.

Með hliðsjón af ofanrituðu og skírskotun til laga um Kjaradóm ákveðast eftirfarandi mánaðarlaun frá 1. september 1995:

I

Forseti Íslands krónur 400.000.

II

Forsætisráðherra krónur 385.000, aðrir ráðherrar krónur 350.000, hvort tveggja að meðtöldu þingfararkaupi.

III

Forseti Hæstaréttar krónur 304.480, aðrir hæstaréttardómarar krónur 276.800.

IV

Umboðsmaður Alþingis krónur 276.800.

V

Ríkissaksóknari krónur 276.800.

VI

Ríkissáttasemjari krónur 276.800.

VII

Ríkisendurskoðandi krónur 245.750.

VIII

Biskup Íslands krónur 241.700.

IX

Dómstjóri í Héraðsdómi Reykjavíkur krónur 241.700, en aðrir dómstjórar krónur 218.500.

X

Héraðsdómarar krónur 210.800.


XI

Umboðsmaður barna krónur 210.800.


XII

Þingfararkaup alþingismanna krónur 195.000.


Um önnur kjaraatriði vísast til úrskurða Kjaradóms frá 12. júlí 1992 og síðar.




Þorsteinn Júlíusson
formaður




Hólmfríður Árnadóttir



Magnús Óskarsson



Jón Sveinsson



Othar Örn Petersen